

Zeitschrift: Annalas da la Societad Retorumantscha
Herausgeber: Societad Retorumantscha
Band: 83 (1970)

Rubrik: Ligia Romontscha = Lia Rumantscha : rapport annual 1969
Autor: [s.n.]

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 22.08.2025

ETH-Bibliothek Zürich, E-Periodica, <https://www.e-periodica.ch>



LIGIA ROMONTSCHA

LIA RUMANTSCHA

Rapport annual 1969

Register

50 onns Ligia Romontscha	3
Lavur cumina	3
La radunonza da delegai	4
Il Cussegli	4
La Suprastanza	5
Il secretariat	6
Las scoulinas	6
Il teater	8
Publicaziuns dalla LR 1969	8
Publicaziuns sustenidas	9
Periodicas dalla LR 1969	9
Nossas societads affiliadas	10
Quei e tschei dalla famiglia romontscha	24
Nos morts	25
Contribuziun annuala dallas vischnauncas	26
Scolettas sustenidas dalla LR per igl onn 1969	26
Quen annual 1969	27
Bilanza 1969	31

50 onns Ligia Romontscha

Igl onn 1969 ei staus en tuts risguards sut l'enzenna dil 50avel anniversari da nossa societad da tett ch'ei vegnida fundada ils 26 d'october 1919. Suprastanza e Cussegl ein dalla bial'entschatta stai pertscharts che quei eveniment porschi ina caschun beinvegnida per far resplender il patratg dil manteniment e dalla promozion da nies lungatg mumma en nova glischür. S'entelli ch'ins ei staus cunscients che la historia dalla LR e da sias societads affiliadas ei en medem temps era quella dils megliers umens che la romontschia ha possedi. Quels umens digl anim grond ein maina vegni stauchels da mussar al pievel la valur decisiva dil lungatg e dad admonir el da buca schar daventar el l'unfrenda d'indifferentedad e d'in patertgar da nez e gudogn. Cun lur lavur sacrificonta ed endinada han els prestau ina cuntribuziun persunala decisiva e nunemblideivla. L'egliada engrazieivla el vargau e l'admiraziun per las prestaziuns da nos antenats ein senza dubi legitimas el mument ch'ins fa il pass sur la sava dil miez tschentaner. Buca meins impurtonta ed urgenta ei denton la necessitat da far in inventari critic dalla situaziun hodierna e da dar in sguard curaschus enviers igl avegnir dalla LR e da nies lungatg periclitau insumma. Quella concepziun dil giubileum ha anflau expressiun impressiunonta el discours festiv da prof. dr. Jon Pult a caschun dalla radunonza da delegai dils 18 d'october a Cuera.

Lavur cumina

Il final exprimiu e suprem dalla LR sco societad da tett ei quel da tender enviers la pli gronda unitad pusseivla. La lavur cumina da tut ils Romontschs ei francada egl emprem artechel dils tschentaments sco pensum principal. La LR ha priu mintga caschun ch'ei sepurschida egl onn giubilari da clamar ils Romontschs a quella lavur cumina per in bein cumineivel. Tras radio e televisiun, en la pressa e radunonzas ei quei tema central adina puspei vegnius formulaus e quei sil funs d'ina responsabladad fundamentala. Ina responsabladad che va lunsch sur las exigencias purmein linguisticas ora e che va sil viv e sil funs da nossa existenza insumma.

Lavur cumina, cuminanza, cumineivladad astgan buca restar bials plaids. Els ston glischar tras ovras sche nus lein evitar la digren totala, la sperdita da substanzia e l'unfrenda da nusezi. Sche nus considerain la situaziun senza illusiu e patos, pia cun spért clar e gigin, stuein nus constatar en tutta mudesiadad ch'il patratg dalla responsabladad cumineivla, dalla solidaritat da derivonza e dalla lavur cumina cunscienta, vulida e beinfatga ei aunc buca daventaus carn. Schi ditg che quei ei buca il cass ein las vestas per igl avegnir stgiras e la speranza mo ina glisch brausla.

La radunanza da delegai

Ils 18 d'october ein ils delegai dallas societads affiliated seradunai tier in cumin romontsch festiv a Cuera. Ensemen cun ina roscha il-lustra ed impressiunonta da hospes han els festivau en moda e maniera digna mo mudesta igl anniversari da nossa LR. Quei di han la famiglia romontscha e quella da ses amitgs e fauturs documentau cun perschuaision la voluntad da purtar il bein artau en tut sia valur e bellezia allas rivas dil tschentaner. Il Departement federal digl intern che demuossa adina puspei gronda capientzcha e simpatia per nos basegns ei staus representaus entras siu secretari general Wilfried Martel, ferton ch'il cau dil Departement d'educaziun, cusseglier gubernativ Hans Stiffler, ha purtau ils salids ed auguris da nossa regenza cantunala.

La voluntad da mantener era egl avegnir nossa ierta spirtala ei era semanifestada el conclus unanim dil Cussegl grond dils 24 da matg d'accordar alla LR in subsidi annual pli ault. Confederaziun e Cantun han pia dau suatienscha cumpleina alla instanza dalla LR e cheutras rinforzau considerablamein la basa materiala da nossas acziuns vegnentas.

Il Cussegl

El senn d'ina inventarisaziun critica ha il Cussegl incaricau ina cumissiun dad examinar il problem e moviment dallas scolettes, ch'ein stadas entochen oz il fundament dil model da nossa acziun linguistica. L'inventarisaziun pertucca tut las scolettes digl intschess romontsch e la situaziun linguistica dallas vischnauncas cun scolettes

romontschas. In aspect ordvart impurtont ei quel dalla formaziun e scolaziun intensivada dallas mussadras. En quei connex sepresenta per il proxim avegnir la damonda dalla incorporaziun ni integraziun dalla scola da mussadras dalla LR el vegnent seminari cantunal per mussadras. La cumissiun ha elaborau in respectiv memorandum per mauns dil Departement d'educaziun. S'entelli che la LR sto e vegn ad insister sin ina formaziun e scolaziun speciala dallas mussadras romontschas, essend che lur pensum e final ei sin divers camps in auter che quel dallas mussadras insumma. La LR spera da puder arrivar ad ina sligiazion e collaborazion cun il Cantun e quei secapescha senza stuer unfrir quei ch'ella ha realisau tochen oz cun grondas unfrendas.

Medemamein el senn d'ina inventarisaziun critica e d'ina documentaziun cumpleta ha il Cussegl numnau ina pintga cumissiun che duei sefatschentar da rudien cun la questiun d'ina retscherca scientifica da meinis en tiara romontscha. Igl ei il pensum dalla cumissiun da sclarir ensemen cun specialists dil fatg tut las damondas preliminaras, sinaquei ch'il Cussegl sappi en enconuschiantscha dils detagls principials, tecnics e materials prender ina decisiun per mauns dalla radunonza da delegai. Dad ina tala retscherca spetg'ins sper l'inventarisaziun critica e la documentaziun tecnica e practica las premissas scientificas per formular ina politica cultural-linguista per igl avegnir.

La Suprastonza

Sper la discussiun e preparaziun dallas acziuns allegadas ei la Suprastonza — e cun ella era il Cussegl — sededicada intensivamein alla situaziun finanziaria ordvart stendida dalla LR. Bein han Confederaziun e Cantun concediu in augment considerabel da lur subvenziuns annualas. Quella augmentaziun munta denton per part nuot auter ch'ina ulivaziun dalla carischia subentrada el decours dil decessi vargau. Per l'autra duei ella esser la basa per puder intensivar las acziuns fatgas entochen oz e per metter ad ir novas acziuns. Las pusseivladads da spargnar e da sanar la situaziun dada ein perquei plitost pintgas.

Grazia alla capientscha e promtidad dallas societads affiliadas ed entrais certas restrincziuns eis ei reussiu da sminuir quest onn il deficit considerablamein. Sche nus lein denton continuar ed intensivar la lavur entschatta, stuein nus anflar novas fontaunas e pusseivladads finanzialas.

Il secretariat

Cun la fin da matg ha nossia giuvna da biro, Ursulina Desax da Danis, bandunau la LR per serender egl exteriur. Nus prendein bugen quella caschun per engraziar ad ella per la buna lavur prestada duront plirs onns. La giuvna da biro dalla LR ha d'ademplir in interessant mo era pretensius pensum.

L'entschatta settember ha giuvna Sabina Spinnler da Bonstetten surpriu la successiun da giuvna Ursulina. Giuvna Sabina che posseda il diplom mercantil e quel da mussadra da scoletta menava vivon la scoletta ladina d'exercezi dalla LR a Cuera. Cun ella possedein nus ina forza ordvart qualificada che enconuscha sper ils fatgs mercantils e tecnics la situaziun dil romontsch da rudien. Nus giavischein ad ella in fritgeivel e liung operar tier la LR.

Igl examen da cunscienzia che nus essan vidlunder da far savess tgunsch e bein modificar considerablamein l'activitad dil secretariat. Gia oz san ins nudar sco segira la necessitat d'in contact pli serrau ed intensivau cun la populaziun ed oravontut cun nossas autoritads da vischnaunca e scola. Il secretari vegn a stuer prender pli intensiv che tochen da cheu contact oravontut era cun nos scolasts ch'ein ils umens da clav dil moviment romontsch. Nus essan perschuadi ch'el vegn sco anteriuur scolast ad anflar ureglia aviarta, promtadad e capientscha tier ses collegas digl intschess romontsch.

Las scoulinas

L'an scuors ais sto per las scoulinas ün an da müdedas e svilup.

Ils 14 avrigl ho cumanzo il prüm cuors d'intraguidamaint in «Chesa Rumauntscha» cun 8 participantas:

Silvia Allenspach, Felben TG; Alfonsina Cahenzli, Siat; Ursina Caprez, Zuoz; Sour Ursula Derungs, institut da Glion; Anna Florin, Samedan; Sour Ulrica Flury, institut da Glion; Lina Horber-Peer, Sent; Margrita Petschen, Mustér.

Il seguond cuors da scolaziun cun 5 participantas ho gieu lö dals 7—31 lügl ed il terz cuors cun 6 participantas dals 4—30 avuost, tuots 2 cuors in «Chesa Rumauntscha».

Illas duas scoulinas a Cuoira sun düraunt l'an scolastic gnidas preparedas 8 practicantas per ils cuors.

La CMR ho organiso sia dieta annuela a San Murezzan dals 7—9 november. Sur 40 mussadras haun piglio part da quels 3 dis da scolaizun, e sgr. Hendri Spescha, secretari LR, ans ho cun sieu stupent referat: «Aspects psicologics dal rumauntsch» danouv do impuls ed eir curaschi da rester cumbatantas per nossa nöbla ierta.

In schner e favrer haun gieu lö las diplomaziuns da las 6 giunfras chi avaivan la sted absolvo il terz cuors. Ils 6 favrer ho il president da la LR, sgr. dr. P. Ratti, pudieu surder a tuottas 6 candidatas il diplom: Erica Baumann, Champfér; Crista Bezzola, Silvaplauna; Frena Christoffel, Flem; Claudia Jörg, Domat; Rosa Spescha, Russchein; Clara Solèr, Tumegl.

Il cumainzamaint marz sun per la prüma vouta 9 candidatas gniadas a Cuoira per fer ils examens da recepziun per il cuors da mussadras dad ün an chi cumainza in october 1970.

«La Scoleta»

Nr. 104 schner: Uraziuns e chanzuns da la damaun

Nr. 105 marz: Versins da dainta e da dumbrar our

Nr. 106 october: Gös da cumpagnia per dadains ed our il liber

Referats

«L'impurtaunza da las scoulinas rumauntschas». Quist referat ais gnieu giavüscho da las vschinaunchas Domat, Flem e Zignau. «Buns givarets»: Breil.

Nouvas scoulinas

Cun grand plaschair avains constato cha adüna dapüssas vschinaunchas muossan il bsögn d'avrir scoulinas. La cifra s'ho augmanteda da 59 sün 66. La dumanda zieva mussadras ais usché granda chi d'ais il prievel da na pudair furnir avuonda mussadras. (Our da quists motivs avains stuvieu lascher serro la scouлина da Pasqual.)

In Surselva haun seguaintas scoulinas aviert lur portas:

Laax cun giunfra Martha Camathias
Sagogn cun giunfra Alfonsina Cahenzli
Zignau cun giunfra Margrita Petschen
Vuorz cun giunfra Ursula Elsbeth Joos

In Engiadina:

Samedan ho üna terza scoulina chi vain mneda da giunfra Beatrice Parpan e Puntraschigna üna seguonda suot la direcziun da giunfra Ursina Cabalzar. Sent ho uossa eir üna scoulina sur an cun duonna Lina Horber.

Preparativs

Eir l'an scuors ho purto bgera lavur cun preparer il cuors d'ün an. Tuot nossas forzas sun oz ingaschedas cun preparativs e damaun cun der uras a las scolaras. Che furtüna d'avair tuot ils locals vulieus in Chesa Rumauntscha!

Gratulaziuns

Giunfra Anna Capadrutt Dalegn/Preaz e duonna Tregna Fümberger, Calantgil haun accumplieu lur 25evel an scoulina. Nus gratulains ed ingrazchains per lur grandas prestaziuns.

Per glivrer ün cordiel grazcha fich a tuot nossas mussadras chi lavuran di per di per nossa favella. Ma eir a nossas magistras ed a sgr. Hendri Spescha per sieu sustegn cun der uras in scoula e cun sia grand'incletta per las scoulinas saja ingrazcho cordielmaing.

L'inspectura: Angelina Secchi

Il teater

Sil camp dil teater romontsch ein nossas speronzas e nos giavischs per igl onn da rapport buca secumpleni diltut. Ulteriurs auters pensums han impidiu nus da sededicar da rudien a quella ton impurtonta damonda. Ensemen cun la Societad pil teater popular svizzer vegnin nus denton segir ad anflar per igl onn proxim ina via ed ina migliur dalla situaziun.

Publicaziuns dalla LR 1969

Cudischets OSL e LR, ediziun cumineivla dall'Ovra svizra da lectura per la giuventetgna e dalla LR:

- Nr. 1068 Dani, tias nuorsas da Gion Deplazes, sursilvan.
- Nr. 1069 La veglia dalla Cafuglia da Casper Seeli, sursilvan.

Nr. 1070 *S colars scrivan*, carnet interromontsch screts da scolaras e scolars.

Nr. 1071 *I l vair agnè da Bethlehem* da Erika Schubiger/ Duri Gaudenz, ladin.

Nr. 553/I *La tgora da Maschal Curdegn* da Alphons Daudet/Franzestg Schmid, surmiran, 2. ediziun.

En ediziun dalla LR:

M auruse Madleina da Alois Carigiet, versiun ladina e sur-silvana da Cla Biert e Hendri Spescha.

Via e velo per Plasch e Flurina, entruidament da traffic da Duri Capaul / J. C. Arquint / Alexi Decurtins, ladin e sur-silvan.

Ensemen cun l'Uniun dals Grischs:

Fain manü, istorgias per uffants da Cla Biert.

En connex cun las ediziuns lessen nus exprimer nies sincer e resentiù engraziament alla PRO HELVETIA ed alla Cuminanza da lavur grischuna per il bien cudisch per lur susteniment generus. A nos auturs, scribents e translaturs in grond Dieus paghi per lur lavur.

Publicaziuns sustenidas

Pass ainten la neiv, patratgs an rema da Gion Peder Thöni, ediziun digl'autur.

Die Germanisierung von Bonaduz in geschichtlicher und sprachlicher Schau da Pieder Cavigelli. Casa editura Huber, Frauenfeld.

Periodicas dalla LR

Il Giuven Grischun, fegliet meinsil per la giuventetgna romontscha grischuna. Cumpara en tuts idioms sis gadas duront il temps da scola. Redacziun: Clau Derungs, Razén. Collaboraturs: Nicolaus Caduff, Degen; Angelo Tscharner, Giuvaulta; M. A. Schaniel, Tinizong; Rico Falett, Lavin. 5. annada.

La Pùnt, fegliet per la Sutselva. Redigius da Stiafen Loringett, Cuera. Cumpara mintga meins. XVIII. annada.

La scioleta, fegliet per la Cuminanza Mussadras Rumantschas (CMR) en tuts idioms. Redacziun: Angelina Secchi. 20avla annada.

Nossas societads affiliadas

Societad Retoromontscha

Cun plascher e satisfacziun astgein nus mirar anavos silla laver prestada. Nossa suprastanza ha delibrau las fatschentas currentas da nossa societad en duas sesidas dils 9 matg e dils 26 da settember; la Cummissiun filologica ha tractau las damondas scientificas da nies institut en duas sesidas dils 11 da schaner e dils 21 da zercladur. La radunonza generala ha giu liug ils 19 da december a Cuera.

1. Nos organs

Il DRG ha fatg igl onn da gestiun buns progress. Quels dis vegn il tierz faszichel a bandunar la stampa, aschia che nus arrivein puspei als treis faszichels (60, 61, 62), allas 12 artgas stipuladas e prevedidas per treis redacturs, malgrad ch'il tierz redactur, prof. dr. J. Arquint, ei pér naven da calonda settember tier nus e quei mo miez il temps. Quest niev sforz da nos redacturs mereta nossa renconuschientscha.

Las Annalas ein cumparidas questa primavera en lur 82avel tom, puspei in volum da varga 300 paginas cun las Funtanas da dret, ils Tschantamaints da Semedan. Beneventar lessen nus ultra dils valents collaboraturs vegls era dus giuvens. Quei fa plascher. Per prevegnir a scadina malentelgientscha denter redacturs, suprastanza ed auturs vein nus scaffiu in model da contract che duei passar en vigur igl onn proxim. En quei contract ei era la damonda da separats scalarida.

2. Biblioteca Ziegler

Quest onn ei sepresentada la pusseivladad da comprar ina biblioteca romontscha dad in vegl antiquar K. Alfred Ziegler, morts avon paucs onns. Cun agid dil cantun ord il Fondo cultural sco era cun sustegn dil seminari romanist dalla universitat da Turitg vein nus cumprau questa biblioteca per 22 melli francs e repartiu encunter pagament ella sin: Fundaziun Planta, Biblioteca claustral, SRR, Universitat da Turitg, Biblioteca episcopala, Museum retic ed entgins interessents privats. Aschia han numerus cudaschs vegls puspei anflau la via a casa. Nies institut, oravon nies cauredactur han giu considereivlas breigias ed acquistau buns merets en caussa. La biblioteca da nies institut ha ultra da quei astgau retscheiver donnaziuns davart da sgr. Chr. Simonett e la casa purila grischuna, dallas soras

Paula e Julia Jörger, dalla Ligia Romontscha ord il relasch St. Burnies. Era il brat da dublettas culla Biblioteca cantunala, la Biblioteca privata Condrau, la Biblioteca episcopala e. a. han gidau ad amplificar considerablamein nossa biblioteca.

3. D a m o n d a s p e r s u n a l a s

Cull'entschatta avrel accumplenescha nies cauredactur ses 65 onns e retila dapi igl emprem fenadur pensiun, suenter ch'igl ei finalmein stau pusseivel a nossa societad suenter considerabels sforzs da metter quella en uorden. Igl ei reussiu a nossa suprastonza da gudignar dr. Schorta per ina ulteriura lavur en nies institut. Tenor contract dils 26 da settember vegn dr. Schorta a luvrar per nus duront sis meins ad onn, sch'ei fa da basegns e sias forzas lubeschan aunc dapli, cunter bonificaziun commensurada. Quest contract vala per treis onns. La carga da cauredactur vul el ad interim suprender mo per in onn.

Nus essan leds da saver mantener a nies dicziunari questa excellenta forza da lavur e sperein da saver far aunc per onns diever da sia gronda experienza e savida.

Il settember vargau vein nus plinavon saviu far in contract cun sgr. prof. dr. J. Arquint. El vegn per ils proxims treis onns incaricaus cun ina mesa plaza da redactur en nies institut, suenter ch'il Cantun ha dau ad el congedi per quei temps. Nus savein bien grau al Cantun Grischun sco al Cussegl pign per quest act da beinvuglientscha viers nossa gronda ovra fundamentala.

A sgr. prof. Alexi Decurtins ha la suprastonza dau la lubientscha da leger duront il semester d'unviern 69/70 ultra da Friburg era mintga jamna ina ga in miez di a Turitg. Nus sperein che quest contact cun las universitads sco oravontut cun la giuventetgna studentica gudogni era in tec alla ga per nus forzas novas. Nus astgein buca piarder ord egl era questa mira, sche nus vulein garantir la continuauziun dalla ovra senza stuer reduzir tempo e ritmus. Ils temps ein semidai taluisa che ins sto beingleiti ir cun latiarna a tschercar las forzas da lavur qualificadas. Sgr. prof. Karl Huber, nies president della Cumissiun filologica ei ussa decan dalla facultad filosofica a Turitg ed ha aschia remess igl uffeci da president. Siu successur ei prof. dr. Hch. Schmid, medemamein dalla universidad da Turitg. Nus engraziein a prof. Huber per sia stenta e lavur e giavischein a siu successur plascher e contentientscha en siu uffeci. Prof. K. Huber ha la suprastonza elegiu unanimamein sco commember d'honur, sespruond aschia da dar expressiun a nossa renconuschientscha per ses merets.

Essend che dir. Tista Murk ha abdicau sco member dalla suprastonza, vein nus elegiu per el in successur en la persuna da ser rev. R. Parli. Tista Murk ha fatg part da nossa suprastonza dapi 1947. Dils 1956—66 eis el staus nies actuar. El mereta nies cordial engraziament.

4. Fatgs alle greivels

Prof. Alexi Decurtins ei vegnius clamaus a Turitg per leger leu duront il semester d'unviern sur la litteratura sursilvana. Prof. Hch. Schmid ei vegnius elegius president dalla Cummissiun filologica e prof. K. Huber nies commember honorari.

Nies cauredactur dr. Schorta e prof. Pult, nies vicepresident, ein vegni elegi honorificamein ella Cumissiun federala che ha la tgira per damondas dils Romontschs e dil romontsch alla scola aulta.

Nus lessen buca concluder quest onn e quest rapport senza engraziar a nos commembers da suprastonza e cumissiuns, a nos redacturs sco a tuts nos gidonters, fauturs ed amitgs per lur lavur e beinvu-glientscha demussada.

G. Deplazes

Romania

La Surselva sesanfla da present en in process da midada. Quei sereferescha buca il davos era sil camp linguistic e cultural. Entochen ussa era quella regiun quasi totalmein romontsch. Quei maletg semida e vegn aunc a semidar els proxims onns ualts anetg. La populaziun residenta ei davera aunc romontsch, mo l'influenza d'elements jasters sin nossa viarva e cultura crescha da di per di cun intensitat augmentada. Quei ei per part in effect dil svilup general che sefa novissimamein era enteifer las scheinas romontschas. Tuttina beneventein nus quei svilup, che porscha a nossa populaziun ina undreivla existenza e satisfa cheutras ad in basegns primar dil cars-tgaun. Perquei settracta ei da promover la prosperitat, era sch'ella engrevegiescha nossa existenza culturala. Quels fatgs stuein nus ris-guardar, cu nus sestentein da mantener nies lungatg matern. Nus stuein adattar nies moviment romontsch a quella situaziun. Quei ei buca lev per organisaziuns dilettantas, senza instruments effizients. Mo ei settracta tuttina da far tut il pusseivel per arrivare plaun a plaun a mesiras d'acziun, corrispondentas alla nova situaziun. La Romania spera d'obtener in grond agid leutier entras la retscherca scientifica, che la Ligia Romontschha ponderescha da realisar.

La scola

Igl ei buca necessari da metter en evidenza la muntada dalla scola per il manteniment dil romontsch. Ei entscheiva gia tier ils pignets — tier la scoletta — sco quei che la LR ha constatau gia daditg. A vesta dalla situazun en Surselva, eis ei legreivel, ch'ei vegn era cheu fundau talas instituziuns. Per igl onn 1969 eis ei da menziunar Lags e Zignau. Perencunter ha la scoletta romontscha dalla pleiv catolica da Glion da sbatter cun certas difficultads. Ils geniturs ein denton decidi da mantener ella vinavon. Aschinavon ch'ei regia ina buna collaboraziun denter LR e societads regiunalas, eis ei segir pusseivel d'encuraschar ina u l'autra vischnaunca da fundar ni silmeins da mantener scolettas romontschas.

Tier la scola primara sespruein nus da star en stretg contact cun las conferenzas scolasticas per saver arranschar cuors da perfecziun e realisar auters postulats dil scolaresser. Cun interess persequitein nus era l'instrucziun romontscha al seminari scolastic, demai che quella ei da gronda muntada per las scolas romontschas.

Las ediziuns

La Romania sezza ha ediu 1969 mo igl Ischi, annada 53/54 (1966/67). L'ediziun dils annuaris daventa pli e pli ina grevezia finanziala strusch surportabla per nossa societad. Perquei ha la suprastanza incaricau ina cumissiun sut il presidi da Ignazi Beer d'elaborar ina proposta per ina sligiaziun, considerond ils differents aspects sco pusseivladads finanzialas, cuntegn e fuorma dallas publicaziuns.

A caschun dalla radunonza da delegai dils 28 da december 1969 ha la cumissiun presentau in emprem rapport. Ella postulescha ch'il Tschespèt vegni buca edius mintga onn sco tochen dacheu, mo-bein lu, cu nus possedein ina ovra da qualitat che s'impona. Ils scribents giavischian era in vestgiu individual per lur ovras.

Ariguard igl Ischi, ch'absorba ina summa considerabla, propona la cumissiun d'examinar ina collaboraziun cul Calender Romontsch. La radunonza da delegai approbeschà en principi quellas directivas. La cumissiun, amplificada entras 5 personalitads, vegn a cintinuar las contractivas ed elaborar ina proposta definitiva per la proxima radunonza.

Il Capitel sursilvan prepara l'ediziun dalla son tga scartira en romontsch. Dalla translaziun s'occupescha sur lic.teol. Gion Martin Pelican gia dapi liung temps. In emprem tom cumpara el decuors dalla primavera 1970. Quella ovra ei senza dubi dad eminenta muntada per nies romontsch sursilvan. Cun desideri spetgein nus la re-ediziun dil vocabulari tudestg-romontsch sursilvan.

Pressa romontscha

Novas sligiaziuns sil camp d'ediziuns ed en special dalla pressa s'imponan pli e pli. Suenter ch'il project d'in supplement interromontsch allas gassetas existentes ei vegnius refusaus categoricamein da certas varts, havein nus spetgau otras iniziativas. Talas ein allura era vegnidas lanzadas el decuors da 1969. La Romania vegn a sustener tuttas emprovas ch'intendan da rinforzar la pressa romontscha.

A u t r a s a c z i u n s

La fundaziun da secziuns localas els vitgs ei aunc buca s'avanzada fetg. La realisaziun da quella idea frunta sin difficultads, ed ei sedamonda, schebein nus vulein buca seconcentrar mo sin il promotur e ses collaboraturs. Cun quei problem vegn la suprastonza aunc a s'occupar intensivamein egl onn proxim. En connex cun la radunanza dils scripturs romontschs a Sedrun, ha la Romania gidau ad organisar ina serada romontscha.

Ils students han prevediu ina scuntrada culs scribents romontschs, nua ch'els vulan discussiunar problems dalla litteratura romontscha, oravontut il connex dalla litteratura romontscha cun la societad hodierna.

Ina acziun che serepetta adina puspei ei la fatscha da nos vitgs. L'inventarisaziun els vitgs sursilvans, procurada dils students, ei terminada. Ussa setracta ei da valetar quels resultats e d'instradar acziuns adequatas.

La cumissiun per la restauraziun dil Curtin d'honor a Trun ha preparau la finanziasiun, aschia ch'ins spera da saver exequir las lavurs el decuors da 1970. La radunanza da delegai ha approbau in reglament davart il proceder ed il dretg d'undrientscha. Tenor quel dueien personas ord igl intschess romontsch dalla Ligia Grischa, sefatgas specialmein meriteivlas per la cultura el pli vast senn dil plaid, vegnir undradas en quei liug historic. La fixaziun dallas personas meriteivlas succeda entras in comite special e quei sin proposta dalla Renania e Romania.

Per conclusiun savein nus aunc remarcar entgins legreivels f atgs per sonals. Nies valent commember da suprastonza, sur canoni Giusep Pelican, ei vegnius numnaus vicari general dalla diocesa da Cuera. Prof. dr. Alexi Decurtins, nies vicepresident, ha obteniu per il semester d'unviern 1969/70 ina incumbensa alla universitad da Turitg. Il Cussegl pign ha elegiu lic. fil. Isidor Winzap sco successur da prof. dr. Alfons Maissen al seminari scolastic per l'instrucziun romontscha.

A tut quels che han sin ina moda ni l'autra contribuiu alla promozion da viarva e cultura e da nossa societad admettein nus in cordial engraziament.

Dumeni Columberg

Uniun dals Grischs

Acziuns:

La concurrenza da recitaziun da poesia e prosa rumantscha, manada tras quist on per la prüma vouta ha gnü lö a Samedan (per l'Engiadina e Bravuogn) ed a Scuol (per l'Engiadina bassa e la Val Müstair). Las sairadas han gnü ün fich bun esit. A Samedan han tut part 23 ed a Scuol 25 scolars e scolaras da prüma fin nouvavla classa. Las sairadas sun gnüdas inramadas cun chant e musica da las scoulas dal lö.

Il Radio rumantsch ha organisà sün iniziativa ed idea da l'Uniun dals Grischs ün « Quiz interrumantsch ».

Sco üsità vaina organisà eir quist on ün cuors da teater. In chasa da scoula d'Ardez vain trattà da sar mag. sec. Jon Semadeni il tema « Il teater in scoula ».

L'acziun « Fatscha da noss cumüns » sto gnir reorganisada i'ls prossems ons tant co pussibel. Ils mezs per quist'acziun sun displaschaivelmaing fich restrets.

Publicaziuns:

« Fain manü » nomna Cla Biert seis nouv cudesch d'istorgias. La tscherna es adattada per infants da desch ons amunt.

No sperain cha'l cudesch per infants « Emile's detectivs » possa eir bainbod sortir da la stampa. Quista istorgia es gnüda tradütta dal tudais-ch da M. Bischoff.

Pels pü pitschens es in preparaziun l'interessanta istorgia da « l'homin da l'a ua » (Preussler/Bischoff).

Una surprisa per blers sarà dal sgür la cumparsa da la « Biblia per infants » dad Anne de Vries, tradütta da W. Vital. La cumparsa da quist stupend cudesch es statta possibla cun la collavurazion tanter ils colloquis da ravarendas e l'Uniun dals Grischs.

Pressa:

La nouva cumischiun dal Fögl insembe cul redactur tschercha cun schlantsch nouvas vias per sgürar l'avegnir dal Fögl Ladin.

Jon Plouda

Uniung Rumantscha da Surmeir

La suprastanza dall'Uniung Rumantscha da Surmeir ò er chest'onn sa do totta fadeia da canalisar igls interess digl muvimaunt rumantsch vers la veira meira ch. v. d. vers igl promover e cultivar igl lungatg rumantsch surmiran. Gist per chel scopo én nias creos igls noss organs officials, Igl Noss Sulom, Igl Calender Surmiran e La Pagina da Surmeir. Uscheia èn chels er igl onn corrent cumparias regular-maintg.

Igl Noss Sulom è gio cumparia an sia 48avla annada bagn redigia digl sies fidevel e fitg premuro redacter sigr. scolast secundar Gion Peder Thöni, igl cal tgapescha adegna schi bagn da coordinar prosa e poesia ed uscheia delectar igls sies lectours. Nous angraztgagn agl redacter digl Noss Sulom per sia activitad, sia capacitat e sia fidevladad. Chel sentimaint dangraztgevladad maretta el da tot igl pievel rumantsch.

Igl Calender Surmiran mademamaintg redigia cun gronda capacitat e gost da sigr. Faust Signorell, scolast secundar, ò scu adegna delecto blers lectours rumantschs cun igls interessants tractats istorics. Igl lectour rumantsch catta er ainten chel prosa e poesia an buna variaziun. Er igl redacter digl Calender Surmiran maretta per sia gronda labour igl noss angraztgamaint scu er chel digl antier pievel rumantsch.

La Pagina da Surmeir chella tgera «Colombigna Surmirana» è cumpareida mintga meis regularmaintg. Er chella è fitg bagn redigeida da sigr. scolast secundar Cyrill Brenn. Er schi ella cumpara angal en'da agl meis porta ella adegna las actualitads surmiranas. Igl premuro redacter tgapescha fitg bagn da culeir ni rimnar las ivettas e metter chellas ainten la petta, per uscheia lascher gustar noss pievel rumantsch chell'antschadada litterara. Noss cordial angraztgamaint scu er nossa admiraziun e rancunaschentscha per sia gronda labour dessen esser en radi d'animaziun per sies futur operar scu redacter.

Pass ainten la neiv en codeschet cun belas poesias da Gion Peder Thöni è sortia dalla Stampareia da Franz Durisch a Domat, ainten igl decurs da chesta stad. Igl autour ò do or igl codeschet sen agen chint. An rancunaschentscha ed angraztgevladad ò l'Uniung Rumantscha da Surmeir surpiglia l'expediziun da chell'ovra. La suprastanza dall'URS angraztga agl autour er per chella admirabla labour, tgi dat pardetga da sia activitad ed interess per igl noss tger e bel lungatg da mamma.

La Meiran a scu secziun studentica dall'URS ò sot l'iniziativa digl sies nov president, sigr. Adolf Schaniel, student a Turitg, mano se an Sur- e Sotses igl toc teater «Igl foz saramaint» cun grond success. L'Uniung Rumantscha da Surmeir ò sustignia chell'acziun cun ena dota da frs. 200.—.

La suprastanza ò gia 4 sedutas ed igl parsoura è sto delego tar las sedutas digl Cunsegl dalla Leia Rumantscha, scu er tar sedutas pertinent la reorganisaziun dallas scolettes e per discutar dumondas dalla reformaziun dalla pressa rumantscha.

La Leia Rumantscha ò pudia festivar igl 18 d'otgover igl sies 50avel anniversari. Tar chella festa è er stada anvidada la suprastanza dall'URS cun igls redacters digls noss organs. Tar chella occorenza vagnsa nous purto igls noss saleids d'angraztgamaint e gratulaziun alla Leia Rumantscha an furma musicala.

Pressa rumantscha: Cun grond interess persequitescha la suprastanza igl svilup segl intschesse dalla pressa rumantscha. Sainza dubi è gist la pressa ena pitga essenziala per igl mantignamaint digl noss lungatg, chegl v. d. betg angal digl Surmiran ma bagn digl Rumantsch an general. Nous sustignagn parchegl tottas iniziativas tgi pudessan gidar a rinforzar la posizion dalla pressa rumantscha.

Chor viril Surses: Dont en curt rapport sur dall'activitat per igl mantignamaint digl noss Rumantsch, lessa er menziunar chella bela festa populara digls 22 da zarladour a Savognin. Ena tala festa ò adegna ena gronda valeta culturala e successiva e chegl principal-maintg per igl pievel da muntogna.

Radunanza generala 1969: Chella ò gia lia igls 14 da december a Savognin. Igl noss vigil parsoura, sigr. deputo Toni Cantieni, ò tignia igl referat principal sur «Planisaziun ainten igls cumegns». Igl referent digl de ò trato en tema fitg actual. Tras sia gronda ancunaschentscha da chella matergia ò el pudia porscher agls responsabels representants digls differents cumegns en fitg bung mossaveia per igl avigneir. El ò catto en angraztgevel ed interesso auditori.

Alb. Camen

Renania

La Renania ha igl onn vargau giu da deplorar la sperdita da dus fervents romontschs e commembres honoraris da si'uniu. Il matg ei morts Peter Janki da Vuorz, anteriuur parsura dalla Renania, e viers la fin digl onn Risch Gaudenz da Luven. Els rruaussien en pasch! Schegie che las retschas sesluccan, sto la lavur pil manteniment da

nies lungatg ir vinavon. Oz va ei en nies intschess, specialmein ella Sutselva, fetg grev d'anflar persunas che stattan a disposiziun per in uffeci ni l'auter dalla Renania.

Ils periodics dalla Renania, «Casa Paterna» e «Calender per mintga gi», han puspei astgau cumparer ils 1969 regularmein. Plinavon ha la Renania fatg ina reediziu n d a l l a S u r s e l v a VIII en offset, da quei fetg encuriu cudischet cun la interessanta collecziun da canzuns per chor viril da Hans Erni. Ina nova ediziun dallas Ovras Gian Fontana ei previda per la fin 1970, eventualmein l'entschatta 1971. Legreivlamein ein differentas instituziuns, denter quellas era la Ligia Romontscha, stadas prontas da sustener e cheutras render pusseivla la finanziaziun da quell'impurtonta ovra.

Il mars 1969 ha giu liug la radunanza da delegai dalla Renania a Maton silla Muntogna da Schons. Cun quell'occasiun han la secziun renana ed il chor mischedau dalla Muntogna-sura dau la representaziun dil giug musical «La stiva da filar» da Tumasch Dolf. In grond publicum ha assistiu cun interess e plascher a quei eveniment.

Dils ulteriurs eveniments renans dil 1969 numnein nus: Il fevrer ina sera da referat cun discours da podium a Glion; el centrum ei stau in referat da dr. Willi Dolf, Cuera, sur da problems dalla scola professiunala. Igl avrel ha ina cumissiun dalla Renania sut il presidi dil cassier, Gion Kunfermann, organisau ina stupenta f i a s t a d ' a f f o n s a d A n d e e r ; legreivel ei stau igl agid ch'ils organisaturs han astgau guder da differentas varts, specialmein dalla visch-naunca d'Andeer e dalla secziun renana da quei liug, mintgina sut la bitgetta da signur dr. Gieri Ragaz. Affons ord igl intschess dall'entira Renania, daven da Lon e Maton tochen si Vuorz, han priu part ed ein semiserai en giugs sportivs, cun canzuns e concepts. Talas sescuntradas che han anflau in bien eco, duein vegnir repetidas. Igl october han delegai dalla Renania priu part dalla emperneivla festividat 50 onns Ligia Romontscha a Cuera.

Sper las secziuns existentes en gl'intschess renan eis ei gartegiau a persunas iniziativas d'era fundar mintgamai ina secziun d a l l a R e n a n i a a T a v a u (cau: Gallus Pfister, scolast) ed a Cuera (cau: Danuet Camenisch, scolast). Quellas secziuns han gia realisau ina activitat, a Cuera per part ensemens cun l'Uniu dals Grischs. Als sforzs reuni dils da Cuera eis ei reussiu da contonscher duront sis meins d'unviern mintgamai in priedi romontsch. Tochen ussa ha quei usit giu in bien success.

Era la cumissiun «Fatscha d a n o s v i t g s » sut il presidi da Andreas Darms, Favugn, ei buca stada lischenta. Igl onn vargau han ins cuntuau cun inscripziuns romontschas a Duvin, Riein,

Pitasch, Flond e Veulden. Per il proxim temps ei previu, muort ils mieds augmentai, in'acziun aunc pli intensiva. — Cuors da lungatg per carschi vegnan dai quest unviern els sequents loghens: Calantgil, Andeer, Tusaun, Veulden, Trin, Flem e Vuorz. Per il susteniment e vicendeivel operar cun ils organs dalla Ligia Romontscha seigi exprimiu nies meglie engraziament.

Martin Bundi

Uniun da Scriptuors Rumantschs

I sun gnüdas fattas 20 prelecziuns, ad uffants e creschüts, a Tarasp, Vella, Ramosch, Zernez, Cuoira (Ladinia), Mustér, Sedrun, Medel. Nus eschan fich cuntaints d'avair per quist on chi vain daplü mezs per quist intent, siond ch'eu n'ha darcheu stuvü refüsar dumondas per prelecziuns per mancanza da mezs, quai ch'eu fetsch fich invidas. Prelecziuns da scriptuors promovan la conscientia interrumantscha, ün puonch essenzial per imprender as cugnuoscher, a la fin. Nus ingraz-chain a la LR per sia incletta (cipientscha).

Da prümavaira es gnü signur dr. Beidler pro nus ed ha referi davart ils drets d'autuors. Il secretari da l'Uniun da scriptuors svizzers es hom versà in materia e nus eschan cuntaints da pudair ans volver ad el per chattar la storta tanter ils paragrafs fallatschus e maligns chi sovent ans laschan trar la cuorta cun edituors erudits e glischaröls. A la radunanza generala a Sedrun, chi ha tut ün andamaint allegraivel e früttaivel, vain nus deciss da nun entrar sco uniun aint illa «Alpenländische Schriftstellerbegegnungen». Mo nus intimain a singuls da tour part privatamaing. Ils motivs per quista refüsa sun da uorden finanzial impustüt. Signur Marcus Defuns es gnü acceptà sco nouv commember. La Cumischiun litterara ha premià laviors da Gion Deplazes, Andri Peer e Ludivic Hendry. Per l'on 1970 sun entradas 9 laviors nouvas, per part voluminudas. Vus vezzais insomma cha'ls scriptuors rumantschs sun fich bravs.

D'utuon vain nus gnü ün inscunter culs scriptuors rumens, tips intelligiants chi dan para nüglia mal da chefar als Russ. I han dit cha la cumbatta dals Rumantschs sumaglia ün pa a quella da Don Quixote. Nusoters vain lura fat valair chi detta eir muglins nunvezzai-vels. Lura ils Rumens han dit cha per els Don Quixote saja ün grond eroe. Cun quai ils scriptuors rumantschs d'eiran fich cuntaints. Eu pigl part hoz ad üna radunanza da l'Uniun da scriptuors svizzers, rapresentant ils scriptuors rumantschs. Eu dumond s-chüsa.

Cla Biert

Cumünanza Rumantscha Radio e Televisiun (CRR)

Sen giavisch digls organs da la Leia Rumantscha vign er igl rapport da la Cumünanza dacodavant a s'adattar agl onn calendari scu tgi vign practitgja gio ossa tar las otras societads affiliadas. Consequentamaintg è igl rapport digl onn 1969 pi curt, essend tgi chel digl onn passo (1968) cumpigliva igl spazi da taimp digl matg 1968 anfignen igl matg 1969.

Per la societat Svizra da radio e televisiun è igl onn passo betg sto ena perioda leva. Chella instituziun, tgi è permanent an stretg contact cun la populaziun e giolda igl monopol per la derasaziun dallas emissiuns da radio e televisiun e stada sotaposta a noschas criticas da diversa provenienza e bagn savens cumpletamaintg contradictoricas. Er co sa manifestescha igl conflict tranter las generaziuns. Tschertas criticas èn absolutamaintg betg obiectivas. Ins ò l'impressiun, tgi en cal gruppa tschertga da dominar per sies vantatg radio e televisiun sainza az render chint dalla diversitat dallas opinuns. An occasiun dalla davosa radunanza generala dalla SSR ò igl president central André Guinand constato cun satisfacziun, tgi per furtegna seja la Svizra anc ena naziun, tgi vegia an gronda maioritad, sen per maseira, libertad e veira democrazia.

Nonobstant la critica, tgi porta bagn savens sainza dubi er elements constructivs, vign la SSR er sen venavant cun igls sies mezs limitos an vista agl complex camp da labour (dersaziun d'emissiuns an quater lungatgs) betg angal a mantigneir igl nivell quantitativ e qualitativ d'anfigen ossa, ma bagn tschartger da migliurar igl program segls differents sectors.

Igl svilup dalla tecnica e la evidenta concurrenza tranter radio e televisiun portan cun sasez problems, tgi ston neir disolvias. Dond en sguard sen las finanzas dall'SSR ins pogl constatar, tgi la cefra d'affars monta oz igl dischdobel davant 15 onns. Igl onn 1954 figurava ella cun 17 milliuns e segond igl preventiv digl onn 1970 cun 170 millions. Quest augmaint è d'atribueir an amprema lengia agl grond domber d'abonnents da televisiun. Ma er segl sector digl radio ègl da constatar en grond progress durant la perioda da 1954 a 1970. Igl domber d'ouras da diffusun è carschia da 11 800 igl onn 1954 a passa 30 000. Davant chella situaziun sto la societat s'occupar cun dumondas d'organisaziun, scolaziun e finanzas. Gio da treis onns anno vign mess gronda peisa sen la furmaziun digls quaders ed ena scolaziun sistematica digls collaboratours. Ainten igl preventiv digl onn 1970 figura en credit da 1,3 milliuns per la furmaziun professiunala digl personal dalla televisiun. Concernent igl sector radio stat ena somma da 400 mella a disposiziun.

L'autonomia finanziaria dalla SSR sto naturalmaintg er esser garanteida, senache gl tgi ella saptga adampleir las sias obligaziuns, vol deir realisar igls programs an moda independenta. La televisiun è igl mument an grad da satisfar allas sias obligaziuns cun igls mezs da finanzas disponibels. Per igl radio è la situaziun pi difficila. Avant tgi saveir inditgir las cefras necessarias an quel risguard ègl basins da stabileir igls plans da program sen lunga vista, tgi dapendan dallas pusseblitads tecnicas, spezialmaintg dalla structura dalla reit da diffusiu. Chel problem dess proximamaintg neir scaria sen taragn internaziunal digls organs dalla PTT. Per antant dispona la SSR anc da 5 milliuns reservas per scopos da radio.

Tar chellas retschertgas an connex cun las finanzas sto er igl aspect da razionlisaziun neir risguardo. Tschertas emissiuns custousas e pac adattadas per igl radio, dessen neir derasadas dalla televisiun.

Pianavant vign per igl futur ad aveir li ena miglra repartiziun digls costs generals tranter radio e televisiun.

La societa d regiunala da la Svizra tudestga e ruman-tscha ò an 5 sedutas dalla suprastanza s'occupo an amprema lengia cun igl transferimaint digl orchester sinfonic da Turitg a Basilea. Chella schliaziun e neida appruvada digl comité central.

Da gronda pertada ella stada la discussiun digl previa artetgel dalla constituziun federala concernent radio e televisiun. Aint igl ravogl dallas societads commembras era chel problem gio nia tracto igl onn avant. La suprastanza regiunala ò catto, tgi igl text previa per chella revisiun seja betg digl tot cler an sia formulaziun e savess cotras periclitari l'acceptaziun tras igl pievel. La suprastanza racumonda ord chellas ponderaziuns, tgi er la relativa lescha vigna preparada avant tgi metter an votaziun igl artetgel da constituziun. Dasperas divers affars da rutina ò la suprastanza regiunala fatg var-sacantas tschernas. I sa tracta co da tschernas ainten cumischiuns da la regiun scu er d'ampluias seigl per igl sector da radio e televisiun. Da gronda impurtanza è stada la nomina digl nov chef dala partizun infurmaziun tar la televisiun scu successour da signour H. O. Staub. Igl nov elegia signour Willy Kaufmann ò sen fundamaint da la sia buna scolaziun, formaziun speziala ed experientscha sainza dubi las premissas per satisfar agl grond e delicat pensum da chel dicasteri. Ma er las tschernas da Martin Furgler, chef da sarvetsch tar la partizun sport, Hanspeter Danuser, partizun cultura e scienzia, Rudolf Flury tar la madema partizun, Rudolf Frei tar la partizun informaziun per igl ressort economia, e Guido Wüest tar la partizun familia ed educaziun per igl ressort dumondas religiousas e sozialas òn gia ainten la pressa en eco fitg positiv.

Igls pi urgents problems, tgi vignan ad occupar la societad regiunal igl proxim taimp sarron da metter an funcziun igl nov studio da televisiun a Turitg, eriger da nov u angrondaneir igl studio da radio a Basilea er scu stabilmaint da la direcziun da radio da la regiun, d'examinar la dumonda da finanzs sen lunga vista, tschartger ena nova concepziun per las emissiuns localas e d'integrar las emissiuns rumantschas an moda cuntantevla aint igl program da la regiun.

Per la CRR se za ò igl onn passo puspe purto grond muviment. Sen fundamaint dalla nova organisaziun digl radio e telescola ò la suprastanza tscharnia la nova cumischun, tgi sa cumpona ord las sequentas persunas:

Franz Capeder, scolast, Salouf;
Luzi Tscharner, inspectour da scola, Coira;
Claudio Gustin, scolast secundar, St. Maria;
Martin Huder, scolast secundar, Samedan;
Augustin Manetsch, scolast secundar, Mustér;
Dr. Alfons Maissen, prof. alla scola cantunala, Coira, redactour da la periodica radioscola;
Sep Item, scolast, collaboratour digl post da programs, Coira.

Aint igl decurs da la stad ò signour inspectour Tscharner demissiono scu commember dalla cumischun radioscola ed an sies pe ò la suprastanza tscharnia scolast Gion Kunfermann, Coira. Sen proposta da la suprastanza e da la cumischun radioscola ò la suprastanza da la societad regiunala tscharnia inspectour da scola Töna Schmid scu delege ainten la cumischun naziunala telescola e prof. Alfons Maissen scu delege ainten la cumischun naziunala radioscola. Per la cumischun regiunala telescola òn suprastanza e cumischun radioscola proponea igls scolasts secundars Claudio Gustin ed Augustin Manetsch. La suprastanza da la societad regiunala ò accepto chellas proposas unanimamaintg.

La cumischun da programs dalla CRR è sa redunada igls 14 da zercladour 1969 a Coira sot igl presidi digl president da la CRR tar sia seduta constitutiva. Signour scolast Ludvig Morell da Samedan è nia tscharnia scu president. Scu actuar ò la cumischun numno redactour Hans Caprez, Coira. Sen basa digls statuts è la cumischun da programs en gremium consultativ. Chella schliaziun è betg ena spezialitat da la CRR. Siva las normas digls statuts da la SSR òn tot las cumischuns da program seigl naziunals u regiunals ena muntada consultativa. Cun chegl dess l'impurtanza da la cumischun da programs betg neir schminueida. Aint igl sies discurs davant igls delegos an occasiun da la radunanza generala ò igl directour general Marcel

Besançon fatg attent, tgi il caracter consultativ da las cumischuns da program dess sa manifestar pi savens er avant tgi en emissiun vigna derasada, per exaimpel adegna cura tgi exista tscherts dubis sur dall'opportunitad u la presentaziun d'en program. L'obieciun tgi savess neir fatga, chegl seia en incumbenza da la giunta, constat betg. La giunta ò numnadamaintg an amprema lengia da s'occupar cun la planisaziun e producziun digls programs.

Igls 27 da settember 1969 ò la CRR salvo sia radunanza generala. Dasperas la fatschentas da rutina ò la radunanza stuia ramplazar treis commembers digls sies organs, tgi vevan demissiono. Scu commember dalla suprastanza vign tscharnia an pe da dr. Pally, dr. Fidel Caviezel, secretari digl departamaint da finanza cantunal, aint igl cunsegl per rev. Martin Cavegn, rev. Vinzens Bertogg, Pitasch ed ainten la cumischun da programs scu successour da dr. Caviezel, stud. phil. Giusep Decurtins, Trun. An en interessant referat diluzidescha igl anterioeur parsoura dir. Christian Badraun igl stadi actual e problems tecnics da radio e televisiun aint igl Grischun. Igl premi sustign labour radio-televisiun vign cumpartia a magister Nuot Vonmoos, dirigent e componist, Puntraschigna, ed agl valent chor viril Lumnezia.

Igl nov chef da programs dr. Clemens Pally è antro an funcziun uffizialmaintg igl 11 d'october 1969. El veva pero gio durant la stad presto blera e minuziosa labour an connex cun diversas emissiuns. I descha da menziunar tar chella occasiun er las grondas prestaziuns da Sep Item durant igl taimp digl interregnum. I vi betg numnar igl domber d'ouras suplementaras per betg neir an conflict cun la lescha. Bagn spert siva tgi dr. Pally era an carica òn el e signour Item constato, tgi las relaziuns segl post da programs seian insuffiziantas tant ariguard personal scu indrezs tecnics. Ord chella ponderaziun òn els giavischia ena conferenza ansemene cun la suprastanza e 2 rapresentants da la regiun, numnadamaintg igls chefs dall'administraziun e da la tecnica. Igl esit da chella extendeida discussiun è sto detg positiv er schi vagn igl mument betg anc contanschia tot chegl tgi levan. An vista alla gronda labour segl post da programs ègl da tigneir an igl per igls proxims onns er en eventuala midada digl stabilimaint. Chegl sa lascha naturalmaintg betg far d'oz sen dumang. La labour digl post da programs consista betg angal ainten la realisaziun da las emissiuns rumantschas. El stat er a disposiziun per igl sarvetsch tecnic da studios orsoura. Per igl onn 1969 monta igl domber da talas prestaziuns 361. — An relaziun cun l'acziun da la cadagna da vanteira digls 15 da november 1969 an favour digl carstgan spir-talmaintg mendous ò igl post da programs luvro cun grond success. Igl resultat da la collecta reiva sen ca. 40 000 frs.

La collaboraziun tranter igl post da programs e la giunta è pros-
perevla. La tendenza d'aquistar er forzas giovnas per la producziun
e la preveida sculaziun digls collaboratours da program èn da bene-
ventar fitg.

St. Sonder

Quei e tschei dalla famiglia romontscha

(avrel—december 1969)

Nus nudein cheu zaconts fatgs ed eveniments, bein cunsients da
buca saver esser cumplets:

Sco niev cau dil survetsch commercial dalla Viafier Retica ha il
Cussegl d'administraziun elegiu nies cumpatriot el. inschegnir e lic.
oec. publ. C l a u d i o C a s a n o v a da Cumbel. Sco iniziativ anterius
president dalla secziun studentica dalla Romania vegn el segir era en
siu niev uffeci a ver en egl la caussa romontscha e ses problems.

La radunanza communal da Scuol ha decidiu unanimamein da
buca duvrar pli il num dubel «Scuol/Schuls», mobein mo il num ro-
montsch Scuol. Ina decisiun legreivla che anfla speronza imitaziun
era en auters loghens.

Dils 8 entochen ils 12 d'avrel ha il seminari romontsch dall'Universi-
tad da Friburg sut la direcziun da prof. dr. A l e x i D e c u r t i n s
ensem cun ina partida personalitads dil moviment romontsch fatg
in viadi da studi el Friaul ed ellas Dolomitas. Il viadi ei staus in suc-
cess cumplein en tuts graus.

Igl enconuschent film «Flurina» che sebas sil cudisch d'affons dad
A l o i s C a r i g i e t e Selina Ch ö n z ei vegnius premiaus al
festival da film «Rassegna Internazionale Cinematografica» cun il
grond premi «Razzo d'Oro».

Suenter in discuors dil president dalla cumissiun predeliberaonta,
deputau O t t o L a r g i a d è r , Puntraschigna ed in votum da depu-
tau T o n i C a n t i e n i , Vazsu, ha il Cussegl grond decidiu ils 22 da
matg cun 98 : 0 vuschs d'alzar la subvenziun dil Cantun alla LR dad
80 000.— sin 120 000.— frs. ad onn. A cussegliers, deputai ed admini-
straziun schein nus in grond Dieus paghi!

Il premi radio e televisiun dalla CRR han obteniu uonn il cumpo-
nist e magister N u o t V o n m o o s , Puntraschigna ed il C h o r
viril L u m n e z i a . Gratulaziun cordiala als digns undrai.

Nos morts

Ils 29 da matg ei president Peter Janki, Vuorz, naschius ils 1885, ius vi en la perpetnadad. Sper sia activitat sociala e politica ha Peter Janki era dedicau sias forzas a lungatg e cultura. Duront onns ora eis el staus suprastont ed in temps era president dalla Renania. Cun el piarda la romontschia ina persunalitad profilada e marcanta.

En siu 50avel onn ei morts ils 6 d'uost Aluis Arpagaus, in raquintader da grondas qualitads. Igl autur da «Per rovens e runtgas» (Tschespet 29) ei staus tut sia veta igl um dalla sufrientscha fisica e psihica. E tut sia veta eis el staus en l'umbriva. Sias ovras vegnan senza dubi a glischar ton pli clar egl avegnir.

Ils 6 da december ei il valent cumponist e dirigent Walther Aeschbacher ius suenter ina liunga e dolurusa malsogna vi en l'armada gronda. Ils merets dad Aeschbacher per la canzun romontschia e per la formaziun pedagogica d'ina entira generaziun da dirigents romontschs ein ordvart gronds.

Nus lein tener nos morts en buna e respectusa memoria. Lur prestaziuns duein animar nus da far il nies, mintgin sin siu post ed en la mesira cumplicina da sias pusseivladads.

Il parsura: dr. Pierin Ratti

Contribuziun annuala dallas vischnauncas

Per igl onn 1969 han las suandontas vischnauncas pagau questa contribuziun:

S-chanf	46.70	Sumvitg	20.—	Morissen	20.—
Breil	100.—	Parsonz	10.—	Tumegl	30.—
Andeer	100.—	Riom	20.—	Ruschein	30.—
Duin	10.—	Pigniu	5.—	Medel/Lucmagn	20.—
Guarda	10.—	Tersnaus	10.—	Fuldera	5.—
Vignon	15.—	Sur	10.—	Zernez	200.—
Tinizong	50.—	Sta. Maria	20.—	Valchava	10.—
Andiast	15.—	Vuorz	40.—	Schnaus	10.—
Lohn	3.20	Ziràn	50.—	Surcuolm	10.—
Puntraschigna	80.—	Samedan	125.—	Zuoz	120.—
Rueun	25.—	Flond	10.—	Madulain	10.—
Bonaduz	50.—	Tarasp	20.—	Preaz	30.—
Tschlin	20.—	San Murezzan	50.—	Ardez	50.—
Lumbrein	30.—	Casti	50.—	Uors-Peiden	10.—
Surcasti	10.—	Sagogn	50.—	Trin	40.—
Razén	50.—	Salouf	20.—	Domat	100.—
Silvaplana	50.—	La Punt-		Laax	30.—
Segl i. E.	20.—	Chamues-ch	20.—	Alvagni	20.—
Mulegn	10.—	Mustér	50.—	Müstair	20.—
Tujetsch	30.—	Scuol	100.—	Calantgil	20.—
Castrisch	20.—	Scharans	25.—	Trun	50.—
Brinzauls	15.—	Camuns	10.—	Ramosch	30.—

Scolettas sustenidas dalla LR per igl onn 1969

Alvagni	800.—	Puntraschigna	500.—	Surava	1 000.—
Bravuogn	500.—	Razén	500.—	Tinizong	500.—
Casti	500.—	Sagogn	500.—	Trin	500.—
Castrisch	500.—	Samedan	2 000.—	Valbella	500.—
Champfèr	500.—	San Murezzan	500.—	Vaz	500.—
Danis-Tavan.	500.—	S-chanf	500.—	Vuorz	500.—
Glion	500.—	Segl	500.—	Zignau	500.—
Lantsch	1 500.—	Silvaplana	500.—	Zuoz	1 000.—

Quen annual 1969

A. Quen general

EXPENSAS

Expensas per organs e persunal

Cusseg1	3 373.25
Suprastonza	1 500.05
President	3 000.—
Nuder	750.—
Cumissiuns	2 414.55
Pagas al secretariat	43 308.80
Paga per schubergiar	1 502.40
Supplement da carischia	4 693.80
Supplement da famiglia ed affons	1 950.—
Supplement d'experienza	1 584.80
SVS / SI / CCF	3 627.40
Segirada d'accidents	955.70
Prestaziun agl anterius parsura	2 400.—
Contr. alla segirada da spargn	53.60
Contr. alla segirada da pensiun	1 906.15
	73 020.50

Cuosts da biro

Cuosts da viadi e representaziuns	3 504.35
Material e maschinas da biro	3 168.95
Francatura e vitgira	477.60
Telefon	1 272.15
Cuosts da banca e schec postal	430.45
Tscheins per biros e magasins	6 535.75
Scauldament da biros e magasins	1 117.56
Glisch e forza electrica biros e magasins	512.75
Material per schubergiar	112.25
Reparaturas ed installaziuns	786.—
	17 917.81

Divers cuosts

Biblioteca ed archiv	139.—
Abonnamenti per gasettas e diversa	860.60
Inserats	516.—
Propaganda generala, rapport annual, scartiras d'orientazion	9 218.30
Lavurs tras tiarzas persunas	117.—
Tscheins passivs	404.95
Segirada da fiug	183.80
Cuosts divers secretariat	255.25
	11 694.90

S U B S I D I S

Subsidis regulars

Società Retorumantscha	3 700.—	
Romania	5 000.—	
Uniun dals Grischs	3 700.—	
Renania	3 700.—	
Uniung Rumantscha da Surmeir	3 700.—	
Uniun da Scripturs Romontschs	1 000.—	
Cumünanza Radio Rumantsch	300.—	21 100.—

Subsidis supplementars

Società Retorumantscha	2 000.—	
Romania	9 600.—	
Uniun dals Grischs	6 480.—	
Renania	2 160.—	
Uniung Rumantscha da Surmeir	2 880.—	
Uniun da Scripturs Romontschs	600.—	23 720.—

Per survetsch da referats	678.40	
Per la fatscha da nos vitgs	2 565.85	
Per periodicas d'affons	—.—	

Divers subsidis

URS per «Mossaveia da pleds novs»	—.—	
USR per studis	—.—	
USR per cumissiun litterara	500.—	
USR per ovras litteraras novas	3 100.—	
USR pil teater	—.—	
USR per seradas romontschas	—.—	
UdG per «L'aviöl» e «Dun da Nadal»	870.—	
A particulars (5 000.— ord reservas)	5 500.—	
Per ediziuns litteraras e musica	—.—	9 970.—

Scoletta

Pagas allas mussadras	50 505.90	
Paga alla instructura	16 390.80	
Paga per schubergiar scoletta Cuera	2 997.60	
Supplement da carischia	4 704.60	
SVS / SI / CCF	3 595.85	
Segirada d'accidents	779.70	
Provediment per instructura e mussadras	2 084.30	
Cuosts da viadi per survigilonza	1 174.95	
Cuosts da viadi per mussadras	387.40	
Ediziun «La Scoleta»	300.—	
Subsidi Conferenza CMR	450.—	

Cumpra da material e mobilias	2 234.25
Tscheins per scolettes e cuors mussadras	9 117.75
Scauldament per scolettes e cuors mussadras	1 046.28
Glisch e forza electrica scolettes e cuors mussadras	294.15
Material per schubergiar scolettes Cuera	117.30
Reparaturas scolettes	—.—
Subsidis a scolettes	16 000.—
Cuosts divers	145.25
	<u>112 326.08</u>

Cuosts specials per mantener il lungatg

Pil teater	4 096.—
Per cuors da lungatg	8 157.40
Mieds didactics rom. per scolas fund. tudestgas	117.50
«Il Giuven Grischun»	8 724.80
Cuors en scola	3 487.10
Lectura Sutselva ed il Plaun	—.—
La Pùnt	2 000.—
	<u>26 582.80</u>
	<u>299 576.34</u>

E N T R A D A S

Subsidis e contribuziuns

Subsidi regular dalla Confederaziun	190 000.—
Subsidi supplementar dalla Confederaziun	—.—
Subsidi dil Cantun	120 000.—
Contribuziun dallas vischnauncas	949.10
Sligiau Legat Cadonau	—.—
	<u>310 949.10</u>

Entradas ord investiziuns

Tscheins	105.15
Tscheins ord fonds	850.—
	<u>955.15</u>

Entradas diversas

Contribuziuns publicas per scolettes	19 393.25
Marcau da Cuera	10 000.—
Marcau da Turitg	2 000.—
Taxas dils scolarets	5 759.85
Cuors da lungatg	4 045.—
«Il Giuven Grischun» (1969/70 ord res. 1 500.—)	3 251.95
Marcau da Cuera per instrucziun romontscha	2 000.—
Entradas diversas	—.—
Restituziun supplement per affons	960.—
Scuntrazion cuosts per ediziuns	13 326.85
Entradas per documentaziuns	109.80
	<u>60 846.70</u>
	<u>372 750.95</u>

B. Quen per las ediziuns

EXPENSAS

Cuosts per ediziuns

Vocabulari da Surmeir	5 312.—
Pledari dalla Sutselva.	3 506.50
Cudischs OSL e LR (1969/70 ord res. 5 000.—)	6 130.25
Ouvras Peider Lansel, Il tom	250.—
Reediziun Vocabulari tud.-rom. sursilvan	8 605.10
Reediziun Dicziunari tud.-rom. ladin	4 000.—
Emil e'ls detectivs	1 250.—
Maurus e Madleina (ord res. 6 000.—)	17 012.80
Via e velo per Plasch e Flurina (1969 ord res. 4 000.—)	7 448.—
La strietta (sursilvan)	3 900.—
Fain manü (ord res. 2 000.—)	7 999.10
Canzuns	683.50
Diversa	5 350.80
	71 448.05

Cuosts secundars

Scuntraziun cuosts secretariat	14 020.85
Cuosts da viadi	—.—
Francatura e vitgira	971.97
Installaziuns per magasins	1 550.—
Propaganda	785.90
	17 328.72

Sminuaziun da valeta

	5 136.30
	93 913.07

ENTRADAS

Contribuziuns

Cantun per Maurus e Madleina	2 000.—
Pro Helvetia per La strietta surs.	2 000.—
Cum. pil bien cudisch da giuv. per La strietta	2 000.—
Cum. pil bien cudisch da giuv. per Maurus e Madl.	2 000.—
Cum. pil bien cudisch da giuv. per Fain manü	2 000.—
	10 000.—

Vendita

Divers cudischs	30 210.15
Augment debiturs	2 046.48
	32 256.63
	42 256.63

Quen general

Cuosts	299 576.34
Entradas	372 750.95
Avanzament	<u>73 174.61</u>

Quen d'ediziuns

Cuosts	93 913.07
Entradas	42 256.63
Deficit	<u>51 656.44</u>

Bilanza 1969**A C T I V A S**

Cassa	459.35
Schec postal LR	4 062.12
Schec postal La Pùnt	327.32
Quen current banca cantonala	32 795.25
Debiturs divers	286.60
Debiturs dallas ediziuns	7 091.35
UdG per Ouvras P. Lansel	3 162.—
Participaziun Radio Turitg	200.—
Cudischs avon maun	<u>74 283.85</u>
	122 667.84

Maschinas da biro	1.—
Mobilias da biro	1.—
Mobilias da scoletta	1.—
Biblioteca LR e Caviezal	1.—
	4.—
Activas transitoricas	4 000.90
Deficit	<u>48 325.47</u>
	148 138.90

Deficit La Pùnt	1 354.71
-----------------	----------

Banca cantunala

Legat dr. Pieder Tuor	2 000.—
Legat per scribents malsauns	707.35
Legat dr. Felix Calonder	<u>15 000.—</u>
	17 707.35
	<u>293.873.70</u>

P A S S I V A S

Quen current banca cantunala	—.—	
Crediturs divers	10 590.05	
Crediturs La Pùnt	568.80	
Cassa da spargn pers. LR	6 506.40	17 665.25
Emprest Fundaziun Augustin	3 000.—	
Emprest Fond naziunal per vocabularis	46 400.—	
Emprest Fond naziunal per Ouvras Lansel	5 796.—	55 196.—
Passivas transitoricas		6 297.35

Reservas per intents specials

Per ediziuns linguisticas	109 500.—	
Per ediziuns commemorativas	4 000.—	
Publicaziuns per affons	35 435.60	
Per ovras litteraras novas	2 400.—	
Per ovras musicalas	10 000.—	
Cumissiun da cant	1 500.—	
«La scoleta» fegl per mussadras	146.20	
Cuors mussadras	26 633.95	
Per las scolettes	3 800.—	
Cudischs da scola Sutselva/Plaun	2 200.—	
Lectura Sutselva/Plaun	1 392.—	197 007.75

Banca cantunala

Legat dr. Pieder Tuor	2 000.—	
Legat per scribents malsauens	707.35	
Legat dr. Felix Calonder	15 000.—	17 707.35
		293 873.70